

Visoki predstavnik se susreo sa francuskim ministrom vanjskih poslova

Visoki predstavnik se jutros u Quai D'Orsay u Parizu susreo sa francuskim ministrom vanjskih poslova Dominiqueom de Villpinom. Visoki predstavnik se danas nalazi u jednodnevnoj posjeti Parizu, gdje se susreo sa najvažnijim francuskim zvaničnicima u Ministarstvu vanjskih poslova i u kabinetu premijera kako bi razgovarao o programu reforme u BiH, ulozi Evropske unije u BiH i predstojećem samitu Evropske unije u Solunu.

Visoki predstavnik je obavijestio ministra vanjskih poslova o trostrukim izazovima koje se nalaze pred Bosnom i Hercegovinom. To je prije svega tranzicija, proces koji zahtijeva teške reforme ali koji u konačnici može dovesti do članstva u Evropskoj uniji kao što se to pokazalo na primjeru deset novih članica Evropske unije. Drugo, izgradnja struktura na državnom nivou bez kojih se BiH ne može približiti Evropi. I treće, proces suočavanja sa strašnim događajima iz nedavne prošlosti BiH, za šta je od ključne važnosti hapšenje osoba optuženih za ratne zločine.

Tokom sastanka visoki predstavnik je prezentirao svoje stavove o značaju Evrope za Bosnu i Hercegovinu. "Proširenje Evropske unije prvobitno je zamišljeno u duhu vizije jače i veće Evrope; svjetionika demokratije i stabilnosti ovog kontinenta," rekao je. "Kada govorimo o budućnosti Evrope važno je držati se tog uvjerenja. Bosna i Hercegovina je evropska zemlja i prirodan kandidat za članstvo u Evropskoj uniji. Evropska unija je ujedinila podijeljeni kontinent. Ona sada ima potencijal da okonča nestabilnost koja je uzdrmala njegov jugoistočni dio. Stvarna mogućnost članstva u Evropskoj uniji je inicijativa bez premca za reforme koje su BiH

potrebne, za njeno vlastito dobro – i za dobro Evrope.”

Visoki predstavnik je naglasio da samit u Solunu predstavlja mogućnost da se krene dalje sa programom integracije u Evropsku uniju i na taj način ojačaju reforme u zemlji. Preporučio je osnivanje “Know-how fonda” koji će omogućiti Bosni i Hercegovini i drugim zemljama u regiji da izvuku korist iz iskustva deset novih članica EU, kako bi se i same približile Evropskoj uniji. Visoki predstavnik također je apelovao na nastavak finansijske pomoći i pomoći za obnovu odnosno izgradnju infrastrukture. Također, naglasio je da bi ukidanje viznog režima učinilo dosta na približavanju Evrope građanima ove regije, te apelovao na ministra vanjskih poslova da podrži ideju da Evropska unija u Solunu iznese jasne uvjete koje zemlje regije moraju ispuniti da bi do toga došlo.

Visoki predstavnik je zahvalio ministru de Villpinu za pomoć Francuske Bosni i Hercegovini, a naročito OHR-u. Istakao je da je Francuska jedna od ključnih članica Vijeća za implementaciju mira, te da je njena podrška visokom predstavniku i programu “Posao i pravda” od suštinske važnosti za uspješnost njegovog mandata. On je pohvalio ulogu i stručnost francuskih zvaničnika koji rade u OHR-u, a prije svega rad svoga francuskog zamjenika, višeg zamjenika visokog predstavnika ambasadora Fassiera, na uspostavljanju ogranka koji se bavi vladavinom prava te napretku postignutom u ključnom radu u oblasti pravosuđa.